

Draga muslimanska braćo i sestre,

Mjesec ramazan i ramazanski Bajram su jako važni vjerski događaji za sve muslimane širom svijeta, koji su posvećeni postu, molitvi i dobrim djelima, a to izrazito poštuju vaši prijatelji i komšije kršćani. U ime Papinskog vijeća za međureligijski dijalog i svih kršćana širom svijeta, izražavamo najljepše želje za post, da ga prate dobra djela i radosna trpeza.

I kršćani i muslimani su pozvani da na najbolji način oponašaju Boga. On, Milosrdni, traži od nas da budemo milosrdni i osjećajni prema drugim, posebno prema onim kojima je pomoć potrebna. Također smo pozvani da opraštamo jedni drugima. Kada pogledamo u današnje čovječanstvo, rastuženi smo što vidimo mnogobrojne žrtve sukoba i nasilja, posebno mislimo na stare, djecu i žene, žrtve trgovine ljudima, ljude koji pate od siromaštva, bolesti, prirodnih katastrofa i nezaposlenosti.

Ne možemo zatvoriti oči pred ovim što se događa, i da okrenemo glavu od ljudskih patnji. Istina je da je situacija često složena i da rješenje prelazi naše kapacitete. Jako je bitno da zajedno pružimo pomoć onima kojima je potrebna. Velika je stvar i pokazatelj nade kada vidimo ili čujemo da su kršćani i muslimani udružili snage da pomognu nekome. Udruživanjem snaga, izvršavamo vrlo važnu zapovijed naših religija, pokazujemo Božiju milost.

Neka nam samilosni i svemoćni Bog pomogne da koračamo putem dobrote i samilosti.

Vatikan, 10. juni 2016.

Kardinal Jean-Louis Tauran

Predsjednik Papinskog vijeća za međureligijski dijalog

Biskup Miguel Ángel Ayuso Guixot

Sekretar Papinskog vijeća za međureligijski dijalog